

porta dil Turcho e ha lassà al bassà in governo el so paexe: ha nome Mustafà vayvoda. *Item*, el vayvoda de Smedero e de la Servia si è a la custodia di quel paese: ha nome Rachas. *Item*, el vayvoda del paexe di Creg, ch'è sora Ragusi, ha nome Choachat si è andato ancora lui con la so zente a la porta del bassà, à lassà el so dominio in governo e in guardia. *Item*, questi sono vayvoda come condutieri soto el bassà. Di primi e principali, Alia Milich à zente assai et è valente turcho, Maumethi Cassam à simel zente in so governo, Mechmet beg ancora costui à zente assai: queste tutte cosse ho inteso de uno homo ch'è fuzido del ditto bassà che era suo schiavo, fo preso quando fo soto Dueagin in Corbavia, el qual è zovene di età di anni 25, si chiama Martin, et à me afermado che mai ditto bassà non tien zente asunà, salvo la so corte quando insuna in tre di e va dove el dia andar tal fia i non son asunadi tutti quelli che vien li va drio batando etc. *Ex Pinguento, die decimo Augusti 1499.*

*Da Curzola, di sier Avicze Balbi conte, di 28 lujo.* Dil zonzer di le tre caravele, disse mal si potrà armarle, et disse venendo la galia si vederà di armarla; *tamen* havemo di tre di l'istante come havia armade le caravele et spazate.

*Da Ragusi, dil Gondola.* Non scrive di che zorno, salvo che l'campo dil Turcho è a Metalò, et l'artilarie aviate verso la Morea et l'Albania. Disse darà da far a le terre, et giudicio suo l'armada sua tegnirà occupata quella di la Signoria nostra, etc.

In questa mattina vene in collegio sier Faustim Barbo savio ai ordeni, nostro collega stato a Roma alcuni zorni, qual andò con sier Polo Capelo per caon di certi beneficii per il suo fiol.

Da poi disnar, da pòi vespero per esser la vezia di nostra Dona, el collegio di savi si redusse a consultar. Et è da saper tutta la terra stava in expectation di udir qualcoessa da mar, sperando vittoria in la potente nostra armada, et nel gran animo di sier Antonio Grimani procurator capitano zeneral; et se intese a Corphù si havia fato far uno crocefixo per quello levar come vexillo quando sarà per combater con l'armata dil Turcho. *Item*, fo ditto, uno certo maistro da Bassan era venuto a dir al principe: come nel suo orto li era parso San Marco, dicendoli alcune parole, et che el di nostra Dona di avosto la Signoria haverà la nova di esser rota l'arma dil Turcho. *Item*, fo ditto che l'astrologo dil ducha di Urbim havia scritto de qui la Signoria nostra contra turchi auta vitòria, ma di nulla fo vero.

*Da Brexa, di sier Marchio Trivixan preveda-*

*dor zeneral di . . .* Come era impazà con li provisionati, quali voriano page. Aspeta risposta di quello à da far; et Zenoa è zonto li; et ozi monsignor di Beumonte orator franzese. Li andò contra sier Polo Trivixan el cavalier podestà et lui con assai cavalli, et fo molto honorato, etc.

*Da Roverè, di sier Nicolò da cha da Pezaro podestà, di 12.* Avisa uno Hironimo da Gazam faceanti per il ducha di Milan, zoè todeschi 300 de livia. *Item*, che misier Jorio di Petraplana havia mandato in Alemagna bassa a far 900 provisionati per il ducha preditto; et che nel campo regio di Venosa era pocha zente, et sguizari s'ingrossava; et che a di 15 si fazea una Dieta a Meram, ch'è il zorno di la nostra Dona.

*Da Ravena, dil podestà, di 12.* In materia di un citadin de li, stato a Forli, et à parlato a uno Lodovico fradel di uno secretario di la Signoria, lo qual voria volentieri aderirsi a la Signoria nostra, et à bona mente et disposition verso quella.

*Da Yspurch di quelli signori et consejo.* Fo letto una lettera latina scritta a la Signoria, di 8 di questo, mandata per uno messo a posta. Come hanno bonamente, volontà et amicitia con la Signoria nostra, et voleno mandar domino Gualtier de Stadion capitano a Pordenon con so robe, et do bombarde; per tanto rechiedemo un salvoconduto. Et questo, perchè la Signoria vol, et à posto assai zente a quelli confini, fo consultato di fargelo, etc.

*Nave et caravelle sono in questa terra, a di 14 avosto 1499, et la portada.*

Gripò di sier Hironimo Malipiero, patrom Ambroxin zenovese, de portada de stera 1200, ha bombarde 4.

Nave di sier Lucha da Molim, mal conditionada.

Nave di sier Stefano Contarini, di botte 330 con bombarde 19, curaze 10 et altre munition per uso di la nave.

Caravela, patrom Antonio da Cherso de Donao, de portada de stera 3000, con bombarde 8, polvere un baril et una cassa.

Caravela, patrom Giacomo de Tornelo, stera 2000, con bombarde 9, et polvere barili do.

Caravela, patrom fo Zuam Bianco, di portada stera 1500.

Caravela, patrom Marco de Todaro, stera 2000, bombarde 4.

Caravela, patrom Zuam Antonio Dugolin, stera 2000, bombarde 7.